

Na osnovu člana 31. stav 1. Zakona o sudovima u Federaciji Bosne i Hercegovine („Službene novine Federacije BiH“, br.: 38/05, 22/06, 63/10, 72/10, 7/13, 52/14 i 85/21), člana 8. tačka j) Pravilnika o unutrašnjem sudskom poslovanju („Službeni glasnik BiH“, br.: 66/12, 40/14, 54/17, 60/17, 30/18 i 83/22), Uputstva za anonimizaciju „Službeni glasnik BiH“, br.: 25/24), a u skladu sa Smjernicama za objavljivanje sudskih i tužilačkih odluka, akata i informacija o predmetima broj: 07-02-3-1279-3/2024 od 21.03.2024. godine Visokog sudskog i tužilačkog vijeća Bosne i Hercegovine, predsjednica Kantonalnog suda u Bihaću dana 19.06.2024. godine donosi:

P R A V I L N I K

o objavljivanju sudskih odluka, akata i informacija o predmetima
Kantonalnog suda u Bihaću

Član. 1.

(Uvodne odredbe)

- 1) Pravilnikom o objavljivanju sudskih odluka, akata i informacija o predmetima (u daljem tekstu: Pravilnik) uređuje se postupak i način objavljivanja sudskih odluka, akata i informacija o predmetima u Kantonalnom sudu u Bihaću (u daljem tekstu: Sud), a na osnovu Uputstva za anonimizaciju („Službeni glasnik BiH“, br. 25/24, u daljem tekstu: Uputstvo) i u skladu sa Smjernicama za objavljivanje sudskih i tužilačkih odluka, akata i informacija o predmetima Visokog sudskog i tužilačkog vijeća Bosne i Hercegovine broj: 07-02-3-1279-3/2024 od 21.03.2024. godine (u daljem tekstu: Smjernice).
- 2) Izrazi koji su u ovom dokumentu i prilozima dani u jednom gramatičkom rodu odnose se i na žene i na muškarce.

Član 2.

(Osnovni principi)

- 1) **Javnost**
Sudske odluke, akti i informacije o predmetima ovog suda predstavljaju javno dobro i trebaju biti javno dostupni i redovno ažurirani;
- 2) **Zaštita ličnih podataka**
 - a) Lični podaci obrađivaće se u skladu sa zakonima i pravnim standardima uz poduzimanje propisanih mjera zaštite;
 - b) Pravo na privatnost može se ograničiti u predmetima od javnog interesa u skladu sa zakonima u Bosni i Hercegovini;
 - c) Lični podaci mogu biti objavljeni i uz izričitu pismenu saglasnost fizičkog lica koje je prethodno poučeno od strane ovlaštenog službenika suda o posljedicama davanja takve saglasnosti;

d) Pojedinaac čiji se lični podaci obrađuju i dostupni su javnosti, ima pravo da pod određenim uslovima ishodi brisanje tih podataka ako više nisu neophodni u odnosu na svrhu obrade (u slučaju rehabilitacije, brisanja sudske osude i dr.).

3) **Tačnost i blagovremenost**

a) Svako objavljivanje sadržaja predviđenih ovim pravilnikom treba sadržavati tačne i blagovremene informacije;

b) Sud će postupati sa hitnošću prilikom obrade zahtjeva fizičkih lica za izmjenu ili brisanje objavljenih podataka, odnosno ispravku netačnih i dopunu nepotpunih podataka.

4) **Jasnost i razumljivost**

Prilikom objavljivanja definisanih ovim pravilnikom, vodiće se računa da isti budu objavljeni na način koji je jasan i razumljiv javnosti i medijima.

5) **Kontinuitet**

Sud će održavati kontinuitet objavljivanja sadržaja definisanih ovim pravilnikom na način da će javnosti redovno pružati informacije o toku postupka u predmetima od javnog interesa do njihovog pravosnažnog okončanja.

6) **Trajanje objave**

Svi sadržaji definisani ovim pravilnikom koji se objavljuju na web stranici Suda i putem drugih informacionih kanala za komunikaciju biće dostupni javnosti i medijima dok se ne ostvari svrha njihovog objavljivanja, vodeći računa o pravu na zaborav.

7) **Unifikacija objava i jednostavnost pristupa**

a) Sud će unificirati mjesto i način objave sadržaja predviđenih ovim Pravilnikom kako bi isti bili lako dostupni i pretraživi;

b) Anonimizacija ličnih podataka vršiće se u skladu sa Uputstvom za anonimizaciju VSTV-a BiH, na način da sadržaj teksta bude čitljiv i razumljiv bez obzira na anonimiziranu formu.

Član 3. (Značenje termina)

Pojedini termini upotrebljeni u ovom pravilniku imaju slijedeće značenje:

- Proaktivna transparentnost - aktivno nastojanje Suda da informacije u vezi sa njegovim radom i postupanjem u konkretnim predmetima, a koji su od interesa za različite ciljne grupe, budu blagovremeno identifikovane i adekvatno objavljene bez ikakvog prethodnog zahtjeva za pristup informacijama;
- Reaktivna transparentnost - postupanje Suda po zahtjevima za pristup informacijama kao i postupanje po različitim upitima koji dolaze iz medija i od drugih zainteresovanih lica;

- Specijalizirani web servisi - web servisi na kojima se objavljuju sadržaji predviđeni ovim pravilnikom i to: službena web stranica Suda, centralna Baza sudskih odluka Bosne i Hercegovine, Portal sudske prakse Bosne i Hercegovine, Mape sudskih predmeta od javnog interesa;
- Anonimizacija - postupak obrade ličnih podataka s ciljem da se zaštiti identitet osobe na koju se podaci odnose;
- Lični podaci - podaci potrebni za identifikaciju fizičkog lica definisani Zakonom o zaštiti ličnih podataka BiH;
- Predmeti od javnog interesa u smislu ovog Pravilnika su:

Krivični predmeti:

- a) krivična djela protiv čovječnosti i vrijednosti zaštićenih međunarodnim pravom,
- b) koruptivna krivična djela definisana listom koruptivnih krivičnih djela VSTV-a BiH,
- c) organizovani kriminal,
- d) terorizam,
- e) pranje novca,
- f) krivična djela u vezi sa utajom poreza,
- g) ubistvo i teška ubistva,
- h) trgovina ljudima,
- i) porodično nasilje,
- j) krivična djela u vezi sa neovlaštenom proizvodnjom i prometom opojnih droga,
- k) krivična djela iz mržnje,
- l) krivična djela protiv države i društvenog uređenja.

Parnični predmeti:

- a) diskriminacija,
- b) zaštita okoliša,
- c) autorska prava, zaštita intelektualne i industrijske svojine,
- d) rodna ravnopravnost,
- e) zaštita potrošača,
- f) stečaj,
- g) privatizacija,
- h) kolektivni sporovi,
- i) privredni sporovi sa inostranim elementom,
- j) sporovi o državnoj imovini.

Upravni predmeti:

- a) zaštita okoliša,
- b) konkurencija,
- c) koncesije,
- d) obrada podataka iz zbirke ličnih podataka,
- e) sloboda pristupa informacijama,
- f) izborne žalbe,
- g) javne nabavke,
- h) sukob interesa.

Drugi predmeti u kojima Sud, predsjednik suda ili postupajući sudija utvrde da se radi o predmetima od javnog interesa rukovodeći se slijedećim kriterijima:

- a) vrsta i težina krivičnog djela kao i predmet postupka,
- b) svojstvo učesnika u postupku (npr. imenovani/izabrani dužnosnici u sudskoj, izvršnoj i zakonodavnoj vlasti, novinari, službena lica, javna lica isl.),
- c) ostali opravdani interesi javnosti (npr. stepen društvene opasnosti, pojavni oblik kriminaliteta, zaštićeno dobro, značaj odluke za širu društvenu zajednicu i sl.)

Član 4.

(Način i postupak objavljivanja)

- 1) Sud će na službenoj web stranici objavljivati pravosnažne sudske odluke, kao i informacije o predmetima u toku.
- 2) Predsjednik suda ili postupajući sudija dužan je odluku koju namjerava objaviti na službenoj web stranici suda elektronskom poštom ili na drugi adekvatan način dostaviti ovlaštenom službeniku zaduženom za odnose s javnošću i informisanje (u daljem tekstu: ovlaštenu službenik) uz popunjen Obrazac za indeksaciju koji je sastavni dio ovog Pravilnika (u daljem tekstu: obrazac).
- 3) Ovlaštenu službenik dužan je dostavljenu odluku anonimizirati prema odredbama Uputstva i Smjernica.
- 4) Nakon anonimizacije ovlaštenu službenik dužan je anonimiziranu odluku dostaviti predsjedniku suda ili postupajućem sudiji koji je dužan izvršiti kontrolu da li je odluka anonimizirana u skladu sa Uputstvom i Smjernicama, nakon čega će tu odluku uz popunjen obrazac, elektronskom poštom, ili na drugi adekvatan način, dostaviti IKT službeniku kao web administratoru Suda.
- 5) Web administrator Suda dužan je odluku u word formatu i anonimiziranoj formi uz prateći obrazac dostaviti VSTV-u elektronskom poštom na adresu: VSTVodjelzasudskudokumentacijuiedukaciju@pravosudje.ba sa službene adrese Suda: ksud-bihac@pravosudje.ba. Nakon toga dužan je istu objaviti i na službenoj web stranici Suda u modulu "Sudske odluke" razvrstano po oblastima i pravnim terminima radi preglednosti.
- 6) Predsjednik suda ili postupajući sudija dužan je informaciju iz predmeta u toku, za koju smatra da je od javnog interesa i da je treba objaviti, dostaviti ovlaštenom službeniku radi sačinjavanja saopštenja za javnost.
- 7) Ovlaštenu službenik dužan je sačinjeno saopštenje za javnost dostaviti predsjedniku suda ili postupajućem sudiji na provjeru, a nakon toga isto elektronskom poštom ili na drugi adekvatan način proslijediti web administratoru radi objavljivanja.
- 8) Web administrator dužan je sva dobijena saopštenja za javnost objaviti na službenoj web stranici Suda u kategoriji pod nazivom "Odnosi sa javnošću" potkategorija "Vijesti" sekcija "Saopštenja za javnost".

Član 5.
(Objavljivanje sudskih odluka)

- 1) Objava pravosnažnih sudskih odluka vršiće se uz poštivanje osnovnih principa iz člana 2. ovog pravilnika.
- 2) Pravosnažne sudske odluke objavljivaće se u posebnoj sekciji web stranice ovog Suda u modulu „Sudske odluke“. Radi preglednosti odluka primljenih za objavljivanje potrebno ih je razvrstati po oblastima i pravnim terminima. Minimum podataka koji se moraju obezbjediti su:
 - a) Krivični predmeti
 - naziv krivičnog djela
 - broj predmeta
 - kratki opis pravnog instituta
 - b) Gradanski, privredni i upravni predmeti
 - podoblast
 - vrsta i predmet spora
 - broj predmeta
 - kratki opis pravnog instituta
- 3) Pravosnažne odluke koje ovaj Sud objavi na svojoj web stranici istovremeno će se dostaviti VSTV-u BiH radi njihove trajne pohrane u centralnoj Bazi sudskih odluka na način opisan u članu 4. stav 5. ovog pravilnika.

Član 6.
(Objavljivanje informacija o predmetima u toku)

- 1) Sud će informacije o predmetima u toku, uključujući i informacije o nepravosnažnim odlukama objavljivati u formi saopštenja za javnost, u kategoriji pod nazivom „Odnosi sa javnošću“, potkategorija „Vijesti“, sekcija „Saopštenja za javnost“.
- 2) Raspored suđenja koji sadrži naziv stranke, broj predmeta, satnicu, vrstu spora/naziv krivičnog djela, postupajućeg sudiju i fazu postupka će se objavljivati u kategoriji „Oglasna tabla“ u potkategoriji „Raspored suđenja“. Raspored suđenja će biti dostupan i na naslovnoj web stranici u gornjem desnom uglu.
- 3) Sud će redovno ažurirati „Raspored suđenja“ na način da informacije o suđenjima u predmetima od javnog interesa budu dostupne javnosti najmanje 48 sati prije zakazanog ročišta.
- 4) U sekciji „Aktuelnosti“ objavljuju se isključivo informacije o redovnim aktivnostima Suda i opšte informacije.

Član 7.
(Objavljivanje akata suda)

Opšti akti Suda, a po potrebi i pojedinačni akti vezani za rukovođenje i organizaciju Suda objavljuju se na web stranici Suda u kategoriji pod nazivom „Dokumenti“ potkategorija „Interni dokumenti“ sekcija „Pravilnici“

Član 8.
(Objavljivanje putem drugih informacionih kanala za komuniciranje)

Pravila objavljivanja detaljno precizirana ovim pravilnikom primjenjuju se i za objavljivanje putem drugih informacionih kanala za komuniciranje sa medijima i drugim ciljnim grupama predviđenim Komunikacijskom strategijom VSTV BiH.

Član 9.
(Završne odredbe)

Ovaj Pravilnik stupa na snagu danom donošenja, a biće objavljen na oglasnoj tabli i web stranici Suda.

Broj: 001-0-Su-24-000 526
Bihać, 19.06.2024. godine



PREDSJEDNICA SUDA:
Fata Nadarević

OBRAZAC ZA INDEKSACIJU SUDSKIH ODLUKA

NAZIV SUDA	
BROJ PREDMETA	
SENTENCA (Pravni stav izražen u odluci popunjava se ukoliko odluka ima sentencu)	
PРАВNA OBLAST	
KLJUČNE RIJEČI ZA PRETRAGU/DESKRIPTORI	
PRIMIЈENJENI PROPIS - naziv propisa, broj članka i broj(evi) službenog glasila u kojem je propis objavljen -	
VEZANE ODLUKE - broj(evi) predmeta i naziv suda koji je donio odluku -	

Pripremio/la: